

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Područje općine Tešanj, Teslić i Žepče među 10 najboljih evropskih investicijskih lokacija	1
Potpisan ugovor o uspostavljanju sistema odvojenog prikupljanja i reciklaže ambalažnog otpada u općini Kladanj	1
Općina Bihać predložila 28 mjera za poboljšanje ekonomsko-socijalne situacije	2
Fatima Gušić iz Općine Sapna prvakinja rodne ravnopravnosti u BiH	3
Intervju: Ivo Komšić, gradonačelnik Sarajeva	4
Potpisani memorandumi o razumijevanju između predstavnika UN agencija, Vlade Livanjskog kantona i općina	7
Obilježen Dan Općine Ilijaš i Dan nezavisnosti Bosne i Hercegovine	7
Općina Bihać ostvaruje uštedu više od 1 mil. KM	8
TIKA finansira završetak izgradnje srednje škole u Cazinu	8
Potpisan Memorandum o razumijevanju između Muslim Aid-a i Općine Olovo	9
Omladinska banka Cazin počinje nove projekte u 2014. godini	9
Svečano obilježen Dan Općine Bužim	10
Vlada FBiH dala podršku inicijativi za kreditno zaduženje Tuzle i Zenice	10
LAF seminar na temu borba protiv nezaposlenosti mladih	11

Bilten Saveza općina i gradova Federacije Bosne i Hercegovine

PODRUČJE OPĆINE TEŠANJ, TESLIĆ I ŽEPČE MEĐU 10 NAJBOLJIH EVROPSKIH INVESTICIJSKIH LOKACIJA

Prema ocjenama specijaliziranog časopisa za izravna strana ulaganja, "FDI Magazine" ("Financial Times Group") područje BEAR-a koje čine općine Teslić, Tešanj i Žepče su svrstane u "Top 10" južnoevropskih regija u kategoriji najboljih evropskih investicijskih lokacija prema troškovnoj učinkovitosti u sklopu natječaja Europski gradovi i regije budućnosti za 2014/15. godinu. Rezultati natječaja objavljeni su u dvomjesečnom broju veljača-ožujak 2014. godine FDI magazine koji ima preko 15.000 pretplatnika diljem svijeta koji su korporativni i prekogranični investicijski profesionalci i eksperti.

Područje BEAR-a nalazi se na 10 mjestu konačne ljestvice. BEAR označava Business Excellence Area - Područje poslovne izvrsnosti i predstavlja razvojnu inicijativu općina Teslić, Tešanj i Žepče koju je podržalo Njemačko društvo za međunarodnu suradnju - GIZ.

Kategorije i kriteriji po kojima je stručna ocjenjivačka skupina donijela odluku o proglašenju najboljih evropskih gradova i regija, su ekonomski potencijal, omjer ulaganja i troškova, ljudski potencijali, infrastruktura, kvaliteta života, prijateljsko poslovno okruženje kao i promotivna strategija za privlačenje direktnih stranih investicija. Mjesto na top listi evropskih gradova i regija budućnosti ujedno predstavlja i preporuku ekonomskog lista za lokacije u koje treba ulagati.

Natječaj za najpovoljnije investicijske lokacije u Europi objavljen je u listopadu 2013. godine. Zajedničkim snagama, predstavnici BEAR područja, općina Tešanj, Teslić i Žepče prijavili su se na ovaj natječaj, predstavili investicijske prednosti svog područja, i ostvarili značajne rezultate u dvije kategorije: Top 10 evropskih regija općenito – prema troškovnoj učinkovitosti investicije i Top 10 Malih evropskih regija – prema troškovnoj učinkovitosti investicije.

Za ovu prestižnu nagradu "FDI evropske gradove i regije budućnost 2014/15", prijavilo se 468 gradova i regija, u okviru pet kategorija: ekonomski potencijal, radna sredina, isplativost, infrastruktura i poslovne naklonosti.

„Ovo su izazovna vremena za direktne strane investicije (FDI) u Europi. Sa usporenim rastom u mnogim velikim gospodarstvima i nastavkom prošlogodišnje krize u euro zoni, prilivi u regiju su se znatno smanjili. Stoga je od ključnog značaja za evropske gradove i regije da zauzmu proaktivan stav prema promociji direktnih stranih investicija (FDI) i osiguraju što veću konkurentnost investicijskih okruženja. Naša rangiranja prepoznaju lokacije koje čine upravo to, i ističu odgovarajuće prednosti gradova i regija svih veličina širom Europe“, rekla je Courtney Fingar, glavni urednik FDI Magazine.

RAŽ Žepče i TRA Tešanj, i Odjel za razvoj općine Teslić, zadužene za koordinaciju i razvoj regije BEAR, su u prijavi za Žepče, Tešanj i Teslić, predstavili mjere koje se provode za poticanje stranih ulaganja i mogućnosti koje stoje na raspolaganju stranim investitorima, a koje su i ovog puta bile prepoznatljive prema kriterijima ocjenjivanja najboljih evropskih gradova i regija, što je potvrdilo i rangiranje regije BEAR na visokom desetom mjestu.



POTPISAN UGOVOR O USPOSTAVLJANJU SISTEMA ODVOJENOG PRIKUPLJANJA I RECIKLAŽE AMBALAŽNOG OTPADA U OPĆINI KLADANJ

KLADANJ, 26. februar/veljača – Kompanija Ekopak, Općina Kladanj i JP "Komunalac" iz Kladnja danas su, na ceremoniji upriličenoj u multimedijalno sali Općine Kladanj potpisali ugovor kojim će biti uspostavljen sistem odvojenog prikupljanja i reciklaže ambalažnog otpada na području općine Kladanj.

Ugovor su potpisali direktorica Ekopak-a Amela Hrbat, načelnik Općine Kladanj Jusuf Čavkunović i direktorica JP "Komunalac" Kladanj Suvada Kavazović.



Grb Općine Kladanj

Ekopak će, uz Vladu Japana, učestvovati u sufinansiranju nabavke dva specijalna vozila za odvoz otpada, te finansirati nabavku potrebne infrastrukture za uspostavu sistema odvojenog odlaganja ambalažnog otpada i njegove pripreme za reciklažu.

Nakon nabavke i uspostavljanja infrastrukture u funkciju, kompanija Ekopak će provesti informativnu kampanju kako bi se stanovništvo ove općine na najbolji način upoznalo sa postupkom i značajem odvojenog odlaganja ambalažnog otpada i reciklaže.

Akcentat se stavlja na edukaciju najmlađih, tako da će učenici škola sa područja općine Kladanj biti uključeni u edukativne projekte Ekopaka.

Na ovaj način Općina Kladanj pridružuje se općinama Bihać, Gračanica i Orašje u kojima ovlašteni operater Ekopak uspostavlja sistem odvojenog prikupljanja i reciklaže ambalažnog otpada.



KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.chib-eu.org
www.cbc-bih-mne.org
www.srb-bih.org
www.cbc-cro-bih.net
www.programmedmed.eu
www.tacso.org
www.euroinfocenter.ba
www.balkanfund.org
www.eurelmed.com
www.eacea.ec.europa.eu

Savjeta za ekonomski razvoj Općine Bihać kojeg čini 23 osobe iz svih oblasti društva a koji danas u svojim privatnim firmama zapošljavaju skoro 1.000 građana Bihaća.



Grb općine Bihać

OPĆINA BIHAĆ PREDLOŽILA 28 MJERA ZA POBOLJŠANJE EKONOMSKO-SOCIJALNE SITUACIJE U BIHAĆU

BIHAĆ, 27. februar/veljača – Svjesna teškog ekonomskog stanja u državi Bosni i Hercegovini i u općini Bihać, Općina Bihać je proteklih godinu dana realizirala nekoliko reformskih poteza u oblasti privrede s ciljem privlačenja investitora u Bihać. Prvi korak napravljen je smanjenjem plata uposlenicima u Općini za 20 posto, potom je uslijedilo i smanjenje broja radnika kroz prijevremeno penzionisanje, a novac koji je ušteđen iskorišten je za poticaj poljoprivredi i privredi, kao i za socijalno ugrožene kategorije u Bihaću.

Međutim, reforme koje su pokrenute u Općini Bihaću nisu podržane od strane viših nivoa

vlasti, ali općinska administracija u Bihaću i pored činjenice da nema podršku kantonalnih, federalnih i državnih vlasti pokrenula je novi set mjera za poboljšanje ekonomsko-socijalne situacije u Bihaću. Tim povodom, 27. februara/veljače održana je prva sjednica Savjeta za ekonomski razvoj Općine Bihać kojeg čini 23 osobe iz svih oblasti društva a koji danas u svojim privatnim firmama zapošljavaju skoro 1.000 građana Bihaća.

Na sjednici je usvojen sljedeći Prijedlog mjera za poboljšanje ekonomsko-socijalne situacije u Bihaću:

1. Smanjiti plate načelnicima službi i savjetnicima općinskog načelnika za 15%, ostalim uposlenicima sa VSS i VŠS za 10%, SSS za 5%, te načelniku Općine 20%, a uposlenicima Centra za socijalni rad i Zavoda za prostorno uređenje za 5%.
2. Plate direktora JU i JP Općine Bihać ne smiju prelaziti dvije (2) prosječne plate F BiH.
3. Upotreba službenih telefona u organu uprave, shodno važećem Pravilniku o upotrebi službenih telefona, smanjuje se na 25,00 KM i 50,00 KM.
4. Visina naknade predsjednika i članova svih upravljačkih tijela (Upravni odbor, Nadzorni odbor, Skupština i Odbor za reviziju) JU i JP Općine Bihać neće prelaziti 100,00 KM.
5. Svi uposlenici organa uprave, JU i JP Općine Bihać koji su u poziciji predsjednika ili članova upravljačkih tijela JU i JP Općine Bihać, svoj rad u tim tijelima će obavljati na volonterskoj osnovi.
6. Shodno grantu predviđenom u Budžetu općine Bihać za stipendije studenata, isti realizirati preko komisije koju imenuje Općinski načelnik u sastavu općinskih vijećnika i predstavnika studenata Općine Bihać.
7. Pooštriti kontrolu upotrebe službenih vozila u vlasništvu Općine i JU i JP čiji je osnivač Općina Bihać.
8. Reprezentacija direktora JU i JP Općine Bihać umanjuje se za 40%.
9. Novčana sredstva predviđena za financiranje javnih kuhinja, realizirati kako je predviđeno



Sjednica Savjeta za ekonomski razvoj Općine Bihać

10. Zatražiti od federalne i kantonalne Agencije za privatizaciju kompletnu dokumentaciju o privatizaciji preduzeća na području općine Bihać.
11. Zatražiti informaciju od Općinskog suda Bihać o svim sudskim izvršenjima prodaje pokretne i nepokretne imovine u sklopu državnih preduzeća na području općine Bihać.
12. Općinski načelnik i kolegij Općinskog vijeća, zadužuju se da imenuju radnu skupinu / tijelo u sastavu općinskih vijećnika i privrednika sa područja općine Bihać, koja će preispitati takse na području općine i predložiti visine istih.
13. Hitna uspostava registra socijalne pomoći u Općini Bihać putem Centra za socijalni rad kao koordinatora.
14. Općinskom vijeću općine Bihać predložiti ukidanje naknada za rad kolegija i komisija Općinskog vijeća za vrijeme održavanja sjednica Općinskog vijeća.
15. Pokrenuti inicijativu za izmjenu Zakona o finansiranju političkih stranaka.
16. Uputiti inicijativu Parlamentu F BiH za izmjenu i dopunu Zakona o platama, s ciljem izjednačavanja javnog sektora sa privatnim.
17. Objaviti interne i externe revizije poslovanja Općine Bihać od 2006. do 2013.godine.
18. Uputiti inicijativu prema Parlamentu F BiH, da po hitnoj proceduri, donese izmjene zakonskih propisa koja definišu primanja parlamentaraca, Vlade F BiH, JU, JP i Direkcija čiji je osnivač F BiH u cilju uravnotežavanja istih shodno novonastaloj situaciji.
19. Zatražiti od Vlade i Parlamenta F BiH izmjene Zakona radi smanjenja doprinosa i drugih fiskalnih i parafiskalnih opterećenja privrede kao što su naknade za šume, vode i turizam.
20. Uputiti hitnu inicijativu Vladi F BiH za provođenje reforme javne uprave boračko-invalidske i socijalne zaštite.
21. Zatražiti od Vlade USK-a donošenje Zakona o legalizaciji bespravno izgrađenih objekata.
22. Uputiti inicijativu Vladi F BiH za donošenje Zakona o izmjeni i dopuni Zakona o stečaju.
23. Od Vlade F BiH zatražiti donošenje pojedinačnih mjera kontrole cijena životnih namirnica i energenata.
24. Donošenje Zakona o reviziji i kontroli privatizacije.
25. Ukida se plaćanje svih Komisija u kojima učestvuju uposlenici organa uprave izuzev Komisije za tehnički pregled objekata i Komisije za procjenu prometa vrijednosti nekretnina gdje se naknada za rad njenih članova umanjuje za 30%.
26. Uputiti inicijativu prema Vladi FBiH za izmjenu i dopunu Zakona o građevinskom zemljištu.
27. Rješavanje pitanja državnog poljoprivrednog zemljišta i zemljoradničkih zadruga.
28. Usaglašavanje Zakona o državnim službenicima i namještenicima F BiH i USK-a sa Zakonom o radu F BiH u smislu izjednačavanja statusa uposlenika.

FATIMA GUŠIĆ IZ OPĆINE SAPNA PRVAKINJA RODNE RAVNOPRAVNOSTI U BIH

Fatima Gušić, službenica za odnose s javnošću u općini Sapna dobitnica je prve nagrade za afirmaciju rodne ravnopravnosti za 2013. godinu u Bosni i Hercegovini.

Povodom Sedmice ravnopravnosti spolova, koja, u organizaciji Misije OSCE u BiH i Komisije za ostvarivanje ravnopravnosti spolova Zastupničkog doma Parlamentarne skupštine Bosne i Hercegovine, traje od 2. do 8. marta/ožujka, u zgradi Parlamentarne skupštine Bosne i Hercegovine u Sarajevu upriličena je dodjela nagrade i priznanja prvakinjama i prvacima rodne ravnopravnosti u Bosni i Hercegovini.

Komisija za ostvarivanje ravnopravnosti spolova Zastupničkog doma Parlamentarne Skupštine BiH, na inicijativu OSCE-a, ove je godine prvi put odlučila dodijeliti nagrade i priznanja prvakinjama i prvacima rodne ravnopravnosti.

Prvakinje rodne ravnopravnosti su: Nejra Kadrić iz Sarajeva, dobitnica treće nagrade, Sandra Dukić iz Banja Luke, dobitnica druge nagrade i prvakinja Fatima Gušić iz Sapne.

Nagrade je uručila članica Komisije Nermina Zaimović-Uzunović koja je tom prilikom kazala da je javni poziv za nagrade objavljen 5. februara/veljače.

"Cilj dodjele nagrade jeste promicati i izdvojiti osobe koje su doprinijele ravnopravnosti spolova svojim radom i zalaganjem u BiH na lokalnoj, regionalnoj ili državnoj razini", kazala je Zaimović-Uzunović.

Prvu nagradu osvojila je Fatima Gušić, koja je uspjela aktivirati žene iz malih sredina da se zauzmu za sebe i da djeluju.

Gušić je kazala da ova nagrada, ima posebnu težinu jer dolazi u sedmici ženskih prava te da joj daje dodatni podstrek u daljnjem radu.

"Ova nagrada, u mom dosadašnjem radnom angažmanu je najveća do sada. Neprocjenjivu vrijednost ima jer dolazi od najvišeg zakonodavnog organa u državi Parlamentarne skupštine BiH, odnosno njenih tijela. Nosim je mojoj porodici, općini Sapna, Tuzlanskom kantonu, Federaciji BiH i prijateljima", istakla je F. Gušić.

Prvakinje rodne ravnopravnosti izabrane su po kriterijima izvrsnosti, predanosti radu i zalaganju na polju rodne ravnopravnosti. Komisija je posebno vrednovala stvarni uticaj, djelovanje i



Bihać

Prvakinje rodne ravnopravnosti izabrane su po kriterijima izvrsnosti, predanosti radu i zalaganju na polju rodne ravnopravnosti.



Nejra Kadrić, Fatima Gušić i Sandra Dukić



Fatima Gušić

rezultate u sredinama u kojima prvakinja žive i rade.

Komisija Nagradu dodjeljuje osobama iz Bosne i Hercegovine koje su, prije svega, bile inspiracija u svojoj sredini za pokretanje značajnih promjena u ostvarivanju ravnopravnosti spolova na regionalnom, državnom, subregionalnom ili lokalnom planu u Bosni i Hercegovini u 2013. godini.

Dobitnika Nagrade je mogla predložiti bilo koja osoba, organizacija ili institucija, uz detaljno obrazloženje postignutog doprinosa koji je nominirana osoba imala u promoviranju ili ostvarivanju standarda ravnopravnosti spolova u 2013. godini.

INTERVJU: IVO KOMŠIĆ, GRADONAČELNIK SARAJEVA

Razgovarala: Ajsela ZAHIROVIĆ

SARAJEVO, 4. MARTA (ONASA) - Gradonačelnik Sarajeva Ivo Komšić u intervjuu za Agenciju ONASA govori, između ostalog, o pripremama u vezi sa otvaranjem sarajevske Vijećnice, Prijedlogu odluke o obilježavanju datuma, događaja i ličnosti od značaja za Grad Sarajevo, planiranoj izgradnji Muzeja moderne umjetnosti, obnovi Olimpijskog muzeja u Sarajevu...



Ivo Komšić, gradonačelnik Sarajeva

ONASA: U kojoj fazi su radovi na obnovi sarajevske Vijećnice i kada se može očekivati njeno otvaranje?

KOMŠIĆ: U toku je četvrta - završna faza obnove objekta Vijećnice koja se finansira iz IPA fondova Evropske unije (EU) u iznosu od 5.000.000 eura.

Trenutno se izvode finalni radovi. Na Dan Evrope, 9. maja, svečano ćemo, nakon 22 godine od kada je spaljena, odnosno nakon 18 godina obnove otvoriti Vijećnicu, koja predstavlja simbol stradanja, ali i uzdizanja i neuništivosti Sarajeva.

Vijećnica će imati autentičan i raskošan izgled (i izvana i iznutra), upravo onakav kakav je imala 20. aprila 1896. godine, kada je svečano otvorena i predata sarajevskoj općini na korištenje.

Grad Sarajevo je formirao radni tim koji radi na programu kojim će svečano i dostojno, uz prisustvo diplomatskog kora, predstavnika svih nivoa vlasti u zemlji i ostalih zvanica, te građana, gostiju i turista grada, biti otvoreno ovo reprezentativno zdanje.

ONASA: Sarajevo će u ovoj godini biti Evropski grad kulture. Možete li nam kazati kakve su manifestacije planirane?

KOMŠIĆ: Početkom ove godine prvi put predstavljen je zvanični program "Sarajevo-evropski most kultura 2014." povodom obilježavanja važnih datuma u historiji ovoga grada, počev od 30 godina 14. Zimskih olimpijskih igara (ZOI '84) i međunarodnog Festivala "Sarajevska zima", otvaranja obnovljene gradske Vijećnice, obilježavanja 100 godina od sarajevskog atentata i početka Prvog svjetskog rata, 20. godišnjice Sarajevo Film Festivala, te 60 godina od potpisivanja Evropske konvencije o kulturi.

Grad Sarajevo će u partnerstvu sa domaćim i međunarodnim institucijama objedinjavati, usmjeravati i koordinirati svim dešavanjima planiranim u jubilarnoj 2014.


U sklopu obilježavanja Olimpijade za koju smo emotivno vezani, već smo ugostili hokejaše Slovenije, Austrije i Turske.

Bili smo domaćini još jednom istinskom sportskom spektaklu, Reviji na ledu pod nazivom "Trideset". Poznati olimpijski zlatni klizački par Jayne Trovill i Christopher Dean su prihvatili moj poziv i nakon 30 godina došli na mjesto svoje najveće pobjede, te u prepunoj "Zetri" otplesali svoj čuveni "Boleró" za koji su 1984. nagrađeni najvišom ocjenom. Ova revija je ujedno označila početak kampanje za izgradnju ledene dvorane, neophodne Sarajevu, na kojoj će led biti deset mjeseci godišnje, jer je sve veća zainteresovanost mladih za klizačke sportove, a s druge strane moramo stvoriti uvjete kako bi se naši reprezentativci mogli pripremati za predstojeće Zimske olimpijske igre za mlade (EYOF 2017). Bila nam je u posjeti i naša proslavljena klizačica Sanda Dubravčić, naš veliki prijatelj - osvajač srebra Jure Franko, koji nas često obilazi, a zajedno smo sa našim srednjoškolcima proslavili i Vučkov 30. rođendan.

Grad je, također, podržao prodajnu izložbu učeničkih radova u Historijskom muzeju i otkupio ulaznice koje će biti podijeljene učenicima srednjih i osnovnih škola kako bi kod njih stvorili naviku da posjećuju izložbe, muzeje i pozorišta. Prihod od ovih ulaznica biće usmjeren za sanaciju krova Historijskog muzeja.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.chc.bih-mne.org
www.srb-bih.org
www.chc-cro-bih.net
www.programmemed.eu
www.tacso.org
www.euroinfocenter.ba
www.balkanfund.org
www.euralsmed.com
www.eacea.ec.europa.eu



Sarajevo



Tokom juna biće održan koncert Bečke filharmonije u Vijećnici, svjetska premijera predstave "Bernard-Henry Levyja" u Narodnom pozorištu, znanstveni skupovi, izložbe savremene umjetnosti, niz regionalnih koncerata, biće predstavljeno 14 filmova "Mostovi Sarajeva"...

Gradovi prijatelji - Friedrichshafen i Beč organizovaće izložbu Cepelina i "Dostojanstvo čovjeka". U partnerstvu sa prestižnom organizacijom "Tour de Francea", biće održan i Sarajevo "Grand Prix 2014.", prva biciklistička utrka na našim prostorima, uz

prisustvo jednog broja bivših pobjednika ove velike sportske manifestacije.

Ove godine proslavićemo i 20. rođendan najpoznatijeg sarajevskog brenda, Sarajevo Film Festivala - internacionalne smotre filmske umjetnosti po kojoj je ovaj grad prepoznatljiv i cijenjen u svijetu.

Druga polovina 2014. godine rezervirana je za održavanje kulturnih manifestacija od interesa za Grad Sarajevo (MESS, Jazz Fest, Balet Fest, Bašćaršijske noći, Međunarodni festival folklor...), kojim će biti obilježeno 60 godina od potpisivanja Evropske konvencije o kulturi.

ONASA: Povodom obilježavanja 100 godina od sarajevskog atentata i početka Prvog svjetskog rata očekuje se povećan broj turista. Da li će Sarajevo tim povodom obogatiti turističku ponudu i program za ovo ljeto?

KOMŠIĆ: Prema najavama iz Turističke zajednice Kantona Sarajevo (KS) očekuje se rekordan broj stranih gostiju u našem gradu tokom ove godine. Zbog obilježavanja godišnjica u 2014., posebno povodom 100 godina od početka Prvog svjetskog rata poraslo je interesovanje stranih medija, kao i turističkih agencija koje će program obilježavanja godišnjica nuditi u svojim turističkim aranžmanima. Grad Sarajevo je pokrenuo web-stranicu.

Isto tako, trebamo iskoristiti velike turističke potencijale koje Sarajevo ima zbog svoje historije i pozicije. Međunarodno istraživanje je pokazalo da je Sarajevo deseta poželjna turistička destinacija u svijetu.

Prestizni evropski magazin "City Leaders" prepoznao je Sarajevo kao jednu od najatraktivnijih turističkih destinacija i grad sa velikim investicijskim mogućnostima.

Sarajevo je jedna od 20 destinacija za koje National Geographic smatra da se mora posjetiti u ovoj godini. Njihova lista odražava sve ono što je autentično i što obiluje kulturnim bogatstvom u današnjem svijetu.

Vodeći izdavač putničkih brošura, uputstava i informacija za turiste Rough Guides stavio je Sarajevo na drugo mjesto gradova koje treba podsjetiti u 2014. godini, odmah nakon Rio de Janeria.

Guide kao jednu od karakteristika navodi to da su ulice grada mjesto gdje se susreću najveće svjetske religije, nazvavši ga mini Istanbulom i mini Jerusalemom.

Ugledni američki portal Daily Beast piše kako će Sarajevo ove godine zbog svojih godišnjica biti u centru svjetske pažnje.

ONASA: Šta možete reći o planiranoj izgradnji Muzeja moderne umjetnosti, te obnovi Olimpijskog muzeja u Sarajevu?

KOMŠIĆ: Zahvaljujući finansijskoj potpori Grada Sarajeva, Federalnog i Kantonalnog ministarstva kulture i sporta, 6. februara ove godine ponovno je za javnost otvorena Kolekcija Ars Aevi u Art Depou Centra Skenderija, koji je sredstvima Vlade Italije, rekonstruisan s ciljem smještaja i zaštite umjetničkih djela 150 najznačajnijih umjetnika svijeta savremenog doba, osnivača ove vrijedne kolekcije.

Ovu inicijativu je pokrenuo ambasador Republike Italije Ruggero Corrias koji je najavio naš daljnji zajednički angažman, kako na održavanju ove vrijedne kolekcije, tako i na izgradnji budućeg Muzeja savremene umjetnosti prema doniranim projektima čuvenog arhitekta Renza Piana.

Na poziv ambasadora Corriasa, nedavno je Sarajevo posjetio gradonačelnik Trsta Roberto Cosolini koji je tokom našeg susreta u prostorijama Gradske uprave, a potom, nakon obilaska ove izuzetne umjetničke zbirke, najavio učešće poznate privatne trščanske tvrtke "Illycaffe" na promociji kolekcije Ars Aevi.

Dogovoreno je da uskoro ova tvrtka u saradnji sa timom Fondacije Ars Aevi odabere jednog bh. umjetnika koji je jako vezan za kolekciju kako bi osmislio dizajn jedne serije šoljica illycaffe-e. Cilj je pružiti podršku kolekciji i promovirati je u cijelom svijetu.




Grb Grada Sarajeva

"Sarajevo je jedna od 20 destinacija za koje National Geographic smatra da se mora posjetiti u ovoj godini.

Njihova lista odražava sve ono što je autentično i što obiluje kulturnim bogatstvom u današnjem svijetu.

Vodeći izdavač putničkih brošura, uputstava i informacija za turiste Rough Guides stavio je Sarajevo na drugo mjesto gradova koje treba podsjetiti u 2014. godini, odmah nakon Rio de Janeria."



Sarajevo prije II sv.rata

Želim istaknuti da je Grad Sarajevo od osnivanja kolekcije izdvojio 1.400.000 KM i tako postao najstabilniji partner Projekta Ars Aevi. Riječ je o vizionarskom projektu koji nam treba jer je to projekat koji Sarajevo zaslužuje i na kojem može graditi svoju budućnost.

Sarajevo i Istočno Sarajevo, zajedno sa Olimpijskim komitetom BiH, sredinom januara ove godine ozvaničili su početak kampanje za obnovu Olimpijskog muzeja. Ovaj projekat moramo realizirati jer smo i po njemu jedinstveni. Naime, Sarajevo je prvi grad koji je osnovao muzej poslije olimpijade. Tek poslije njega, to su počeli činiti i drugi olimpijski gradovi. Očekujemo pomoć od Međunarodnog olimpijskog komiteta, Fondacije "Sarajevo srce Evrope", francuske Vlade, te drugih domaćih i stranih donatora. Organiziraćemo akciju – 1 KM za obnovu Olimpijskog muzeja, u saradnji sa bh. telefonskim operaterima.

ONASA: Možete li nam prokomentarisati Prijedlog odluke o obilježavanju datuma, događaja i ličnosti od značaja za Grad Sarajevo?

KOMŠIĆ: Gradsko vijeće je na sjednici održanoj prošle sedmice usvojilo Odluku o obilježavanju datuma, događaja i ličnosti od značaja za Grad Sarajevo, u kojoj je sadržan kalendar obilježavanja. U cijenu svoje slobode ovaj grad je tokom narodnooslobodilačkog rata 1941-1945. i odbrambeno-oslobodilačkog rata 1992-1995. godine, ugradio živote boraca i građana koji su svojom borbom pokazali da ovdje nema mjesta mržnji tuđinskoj vlasti i fašističkom poretku u svim njegovim oblicima. Kao što ne smijemo prepustiti zaboravu naše poginule branitelje, tako ne smijemo zaboraviti njihove najbliže, te preživjele borce, kako bi i konkretnijim akcijama učiniti za njih mnogo više. To je naša ljudska i moralna obaveza.

ONASA: Šestoaprilska nagrada Grada Sarajeva u 2014. godini?

KOMŠIĆ: Već znate da je naša velika sarajevska glumica i prvakinja drame Narodnog pozorišta u Sarajevu Nada Đurevska Odlukom Gradskog vijeća na sjednici održanoj prošle sedmice, dobitnica pojedinačne Šestoaprilske nagrade Grada Sarajeva, arhitekti Ferhad Mulabegović i Smajo Mulaomerović, koji su u kontinuitetu od 1996. do 2008. godine izradili cjelokupne projekte obnove Vijećnice, te u jednom dijelu realizacije ovih projekata učestvovali i kao supervizori, dobitnici su grupe Šestoaprilske nagrade Grada Sarajeva, dok je našoj nogometnoj reprezentaciji pripala kolektivna Šestoaprilska nagrada Grada Sarajeva.

Plasmanom na Svjetsko nogometno prvenstvo u Brazilu ove godine, naši "zmajevi" su ostvarili historijski uspjeh jer BiH prvi put učestvuje na Svjetskom prvenstvu.

Ne sumnjam da su članovi Odbora predložili osobu/e odnosno instituciju/e za ovo najviše priznanje Grada Sarajeva, jer su svojim angažmanom, svako u svojoj oblasti, dali nemjerljiv doprinos u unapređenju, razvoju i promociji grada Sarajeva i države BiH.

ONASA: Ostali planovi Grada Sarajeva za 2014.?

KOMŠIĆ: Kako zbog utrke Sarajevo "Grand Prix 2014.", tako i zbog popularizacije biciklizma u Sarajevu, na proljeće počinje izgradnja biciklističke staze na dionici Nedžarići - most Skenderija sa mogućnošću da se proširi do mosta Čobanija, a u drugoj fazi i do Bentbaše.

Grad Sarajevo će realizirati ovaj projekat u partnerstvu sa Direkcijom za ceste KS, koja će uraditi projektnu dokumentaciju i za dionicu Hrasnica-Nedžarići.

Općina Novi Grad zainteresirana je da se uključi u ovaj projekat tako što planira izgraditi biciklističku stazu na potezu Dobrinja - Nedžarići.

U septembru će naš grad biti domaćin Drugom svjetskom forumu urbanizma, čija će tema biti grad Istanbul. Drugi svjetski forum urbanizma će značajno doprinijeti promovisanju Sarajeva i kao glavnog svjetskog grada urbanizma i multikulturalnosti u vrlo simboličnoj godini za grad Sarajevo. Na ovom dvogodišnjem bijenalu, koje treba da postane tradicionalno, okupiće se najznačajnija svjetska imena iz oblasti arhitekture, urbanizma i prostornog uređenja.

Da je riječ o značajnom skupu za naš grad, govori i podatak da je na prvom sarajevskom urbanističkom forumu "Sarajevo dočekuje Veliki Pariz", koji je održan prije dvije godine, učestvovalo više od 600 svjetskih urbanista, arhitekata, eksperata za zaštitu okoliša...

Zajedno sa Istočnim Sarajevom intenziviraćemo aktivnosti na realizaciji projekata obnove Trebevičke žičare i organizaciji Evropskog olimpijskog festivala mladih 2017. godine (EYOF).

Grad Sarajevo nastavlja sa aktivnostima na izradi projektne dokumentacije namjene i korištenja kompleksa Bijele tabije.

U partnerstvu sa Općinom Centar već šestu godinu izvodimo radove na regulaciji Koševskog potoka, a sa Ministarstvom za privredu KS na čišćenju i sanaciji korita rijeke Miljacke.

Već godinama u budžetu planiramo sredstva za potrebe javnih kuhinja. Najznačajniji i najvrijedniji projekat u oblasti obrazovanja je stipendiranje 220 učenika osnovnih i srednjih škola putem Fonda IKRA, koji potiču iz porodica u stanju socijalne potrebe.

Predstavnici Grada Sarajeva će i ove godine, 12. oktobra, posjetiti šestmilijarditog stanovnika planete Zemlje Adnana Mevića kako bi mu čestitali 15. rođendan.

Grad Sarajevo je jedini ostao dosljedan obećanju da će finansijski pomagati porodicu Mević i tako omogućiti Adnanu sretno odrastanje i školovanje.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpabc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.taco.org
www.euroinfoentar.ba
www.balkanfund.org
www.eurelmed.com
www.eacea.ec.europa.eu



Sarajevo prije II sv.rata

Savez / Zajedno za uređenu i razvijenu lokalnu samoupravu



POTPISANI MEMORANDUMI O RAZUMIJEVANJU IZMEĐU PREDSTAVNIKA UN AGENCIJA, VLADE LIVANJSKOG KANTONA I OPĆINA

Predstavnici UN agencija, Vlade Livanjskog kantona (LK) i općina potpisali su 4. marta/ožujka u Drvaru tri memoranduma o razumijevanju, povodom obilježavanja suradnje i zajedničke implementacije projekta "Primjena koncepta ljudske sigurnosti u cilju stabilizacije zajednica u LK". Riječ je o Memorandumu o razumijevanju između Razvojnog programa Ujedinjenih nacija (UNDP), UNHCR-a, UNICEF-a, Međunarodne organizacije za migracije (IOM), Vlade LK, te načelnika općina Bosansko Grahovo, Drvar, Glamoč, Kupres, Livno i Tomislavgrad u vezi implementacije projekta "Primjena koncepta ljudske sigurnosti u cilju stabilizacije zajednica u LK".

Drugi sporazum je Okvirni sporazum o saradnji između UNDP-a i Vlade LK u sektorima: ruralni i regionalni razvoj, energija i okoliš, socijalna inkluzija i demokratsko upravljanje, pravda i sigurnost, a treći Sporazum o sufinansiranju između UNDP-a i Vlade LK u vezi implementacije Projekta integriranog lokalnog razvoja (ILDP) kojeg financira Švicarski ured za suradnju u BiH (SDC).

Kako je saopćio UNDP, osiguranje uslova za bolji život, unapređenje pružanja socijalnih usluga i drugih oblika podrške ugroženim grupama su samo neki od ciljeva projekta "Primjena koncepta ljudske sigurnosti u cilju stabilizacije zajednica u LK", koji zajednički provode agencije UNDP, UNHCR, UNICEF i IOM, u partnerstvu sa Vladom LK, općinskim vlastima i organizacijama civilnog društva.

Posebna pažnja biće posvećena izbjeglim licima, povratnicima i interno raseljenim osobama koje su se vratile u LK, a koje se i danas suočavaju sa različitim izazovima i poteškoćama u procesu reintegracije.

Trogodišnji Projekat ukupne vrijednosti više od četiri miliona KM finansira UN Fond za ljudsku sigurnost (UNHSTF).

Nakon potpisivanja memoranduma održan je prvi osnivački sastanak Koordinacionog tijela za upravljanje projektima, te upriličeno otvorenje projektnog ureda UN agencija u Drvaru.



Sa potpisivanja memoranduma

OBILJEŽEN DAN OPĆINE ILIJAŠ I DAN NEZAVISNOSTI BOSNE I HERCEGOVINE



Obilježavanje Dana Općine Ilijaš (28. februar) i Dana nezavisnosti Bosne i Hercegovine počelo je svečanom dodjelom ugovora za stipendije učenicima i studentima u Sali KSC-a.

Za školsku 2013/2014. godinu, obezbjeđeno je stipendiranje 69 učenika i 91 studenta. Visina mjesečne stipendije za učenike iznosi 50,00 KM a za studente 100,00 KM. Stipendije će se isplaćivati 9 mjeseci. Ovo je već deseta godina zaredom da Općina Ilijaš stipendira najbolje učenike i studente i suma koja se izdvaja iz općinskog Budžeta narasla je na zavidnih 122.500,00 KM.

Povodom ovog značajnog datuma, 18. godišnjice od dana kada je Općina Ilijaš reintegrirana, upriličena je i svečana sjednica Općinskog vijeća Ilijaš. Kako je mnogo toga urađeno u prethodnoj godini na području općine Ilijaš, načelnik Fazlić je ovom prilikom naveo neke uspješno završene projekte: izgrađena glavna šetnica, rekonstruisan dio puta 126 IB, u punom kapacitetu zaživio stambeno-poslovni centar Banovac, urađen voodovod Bioča, otvorena ambulanta porodične medicine Mrakovo, utopljen vrtić Ilijaš i Osnovne škole "Podlugovi" i "Srednje". U narednom periodu je planirano otvaranje Osnovne škole "Stari Ilijaš" i otvaranje RTG kabineta".

Na svečanoj sjednici uručene su pojedinačne i kolektivne zahvalnice općinskog načelnika.

Također, u okviru ovih svečanih dana, u kino dvorani ilijaškog KSC-a održana je tradicionalna manifestacija Izbora sportiste godine. Prošla, 2013. sportska godina je za Ilijaš bila više nego uspješna. Stonoteniski klub „Hašim Spahić“ i Odbojkaški klub Ilijaš ostvarili su plasman u Premijer ligu BiH, i to bez izgubljenog meča, KK „Mladost“ plasman u 1. Ligu Federacije, mladi nogometaši su osvajali međunarodne turnire u Austriji i Sloveniji, mlade stonoteniserke Amila Spahić i Harisa Mešetović su nakon osvajanja klupskog prvaka BiH imale zapažen uspjeh na Evropskom prvenstvu u stonom tenisu u Strasbourg-u (Francuska), a karatisti Šukrija Nedim, Livoreka Vahida, Brkić Edina i Balta Nedim bili su članovi reprezentacije BiH na Balkanskom prvenstvu u karateu koje je održano u Kragujevcu.

Dane vikenda obilježio je turnir u karateu „Ilijaš open 2014“ i turnir u malom nogometu u organizaciji Sportske akademije Ilijaš koji su održani u Sportskoj dvorani Ilijaš.



Grb Općine Ilijaš



Sa turnira u karateu „Ilijaš open 2014“



Grb Općine Bihać

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocehtar.ba
www.balkanfund.org
www.eurelmed.com
www.eacea.ec.europa.eu

OPĆINA BIHAĆ OSTVARUJE UŠTEDU VIŠE OD 1 MIL. KM

BIHAĆ, 4. mart/ožujak – Prošlosedmični prijedlog mjera za poboljšanje socio-ekonomskog stanja na području Općine Bihać kojeg je predložio mr.sci. Emdžad Galijašević, Općinski načelnik Bihaća zajedno sa članovima Savjeta za ekonomska pitanja, počeo je davati prve konkretne rezultate. Općina Bihać još krajem prošle godine prilikom usvajanja Budžeta za 2014. godinu planirala je novo smanjenje plata uposlenika u organu uprave, a nakon pregovora sa sindikatom postignut je dogovor o smanjenju plata za 7,94 posto što će ove godine Općini Bihać donijeti uštede u budžetu u iznosu od 567.000 KM. Sa uštedama od 529.000 KM koje će biti odlaskom 19 uposlenika u prijevremenu penziju, općinska administracija u Bihaću u ovoj godini ostvariti će tako uštede od 1.096.000 KM, navodi se na web stranici Općine Bihać.



Potpisivanje Sporazuma

Sporazum o smanjenju plata potpisali su Svjetlana Kurbegović, predsjednica Sindikata zaposlenih u Organu uprave i mr.sci. Emdžad Galijašević, Općinski načelnik Bihaća. U svojim obračunima istakli su da je teška socio-ekonomska situacija u državi više od godinu dana pokrenula općinsku administraciju u Bihaću da povuče poteze koji su prije svega se odnosili na smanjenje plata zaposlenim u Općini Bihać. Tako je od dolaska načelnika Galijaševića u novembru 2012. godine plata sa posljednjim smanjenjem snižena za ukupno 27 posto što je omogućilo znatne uštede i stabilizaciju općinskog budžeta.

“Nažalost iz dana u dan punjenje općinskog budžeta je sve slabije i kako stvari stoje Općina Bihać ići će na rebalans budžeta i neke infrastrukturne projekte koje smo ove godine planirali odgoditi ćemo za neka bolja vremena. U ovoj godini mi se još više moramo okrenuti našim sugrađanima koji su socijalno ugroženi i pomoći im da prežive ova teška vremena. Učiniti ću sve da ovogodišnji budžet stabiliziramo i usmjerimo ka socijalnoj kategoriji, poljoprivredi, privredi, kulturi i sportu. Reforme koje Općina Bihać provodi već godinu dana nažalost ne prate ostali nivoi vlasti i javna preduzeća gdje i danas imamo astronomska primanja uposlenika dok s druge strane 45 posto radno sposobnog stanovništva živi na ivici siromaštva“, kazao je načelnik Galijašević.

On je dodao da će u narednom periodu Općina Bihać nastaviti sa realizacijom mjera koje imaju za cilj smanjenje troškova u javnoj upravi i preduzećima kojima je Općina Bihać osnivač.

TIKA FINANSIRA ZAVRŠETAK IZGRADNJE SREDNJE ŠKOLE U CAZINU

Direktor Turske agencije za razvoj i saradnju – TIKA za BiH, Zulkuf Oruč prilikom posjete načelnika Općine Cazin, mr. Nermina Ogrševića prenio je zvaničnu informaciju da će TIKA finansirati završetak radova na izgradnji novog objekta Druge srednje škole u Cazinu. „Došli smo s jednom radosnom vijesću. Mi naime, već nekoliko godina imamo odličnu saradnju i povezanost s načelnikom općine Cazin g. Ogrševićem kojem smo danas saopštili da smo odabrali projekat najveće vrijednosti u USK, odnosno da ćemo završiti izgradnju objekta Druge srednje škole, kazao je Oruč. Inače, ovo je najveći projekat TIKE u Unsko- saskom kantonu i prvi koji SE realizira u Cazinu.

TIKA u ovom projektu isključivo želi nadzor samoga načelnika Ogrševića i njegovu punu uključenost u projekat do samog završetka koji je planiran već za kraj mjeseca aprila.

Načelnik Ogršević je istakao kako je ovo jedan od prioritarnih projekata i da će općina Cazin učiniti sve kako bi se pomoglo u njegovom uspješnom okončanju. „Ovo je značajna vijest za sve građane naše općine jer je to projekat namijenjen našoj djeci. Zahvalni smo agenciji TIKA i turskom narodu na svakoj podršci i raduje me činjenica što nam je ukazana jedna ovakva prilika, rekao je načelnik.

Nakon susreta s načelnikom, predstavnici TIKA-e i načelnik Ogršević posjetili su Drugu srednju školu čiji direktor Zlatan Topić je izjavio da se radi o historijskom trenutku za 65 uposlenih i 967 učenika ove škole. Kako je kazao, dovršetkom novog objekta dobija se potpuno nov prostor u kojem će nastava moći funkcionirati u jednoj smjeni. Vrijednost projekta na novom objektu Druge srednje škole je oko 800.000 maraka.

Susret načelnika Cazina sa
direktorom TIKA-e



POTPISAN MEMORANDUM O RAZUMIJEVANJU IZMEĐU MUSLIM AID-A I OPĆINE OLOVO

OLOVO, 04. mart/ožujak –

Danas je u prostorijama Općine Olovo potpisan Memorandum o razumijevanju između organizacije MuslimAid (Muslimanska pomoć) i Općine Olovo u cilju realizacije poljoprivrednih projekata na području općine Olovo, navodi se na web stranici Općine Olovo.

Projekat podrazumijeva podršku poljoprivrednim proizvođačima, sa karakterom poljoprivredno-socijalnih programskih aktivnosti u oblasti:

Plasteničke proizvodnje

Uzgoja krupne stoke (krava i junica)

Uzgoja sitne stoke (ovaca)

Pčelarske proizvodnje i

Proizvodnje malina



Vrijednost projekata je cca 150.000, 00 KM i podrazumijeva finansiranje i to:

1/3 projekta finansira Općina Olovo

1/3 projekta finansira MuslimAid

1/3 projekta finansiraju krajnji korisnici

Za realizaciju navedenih projekata raspisat će se javni poziv građanima općine Olovo da učestvuju u istom. Nakon izbora korisnika, organizacija MuslimAid će izvršiti obuku korisnika kako bi se što kvalitetnije pripremili za izazove koje sa sobom nosi poljoprivredna proizvodnja.

Ciljna grupa krajnjih korisnika jesu građani općine Olovo koji su lošeg materijalnog stanja, demobilisani borci, osobe registrirane na Birou rada, samohrane majke, i drugi građani koji budu zadovoljavali uslove koji budu postavljeni javnim pozivom.



Grb Općine Olovo

OMLADINSKA BANKA CAZIN POČINJE NOVE PROJEKTE U 2014. GODINI



Načelnik Ogřešević sa članovima Omladinske banke

Projekat Omladinska banka, koji općina Cazin realizira u saradnji s Fondacijom „Mozaik“, ovih dana započinje svoj drugi ciklus, javljeno je iz Press službe Općine Cazin.

U protekloj je godini podržano 13 projekata neformalnih grupa ukupne vrijednosti 40.169,78 maraka, od čega je iz fonda Omladinske banke uplaćeno 17.692,10 KM (8.846,05 KM su sredstva Općine Cazin i 8.846,05 KM sredstva USAID/Mozaik), a 22.477,68 KM su sredstva koja su obezbijedile neformalne grupe iz zajednice. Na ovaj način se tim Omladinske banke iz Cazina već prilikom prvog uključivanja u projekat našao u samom vrhu po uspješnosti

što je bio jedan od najvažnijih razloga za nastavak projekta i u 2014. godini.

„Sada počinjemo novi krug radionica u koje su uključeni i neki novi članovi tima Omladinske banke Cazin, a objavili smo i javni poziv za nove projekte s kojima mladi mogu aplicirati i vjerujem da je pred nama još jedna uspješna godina“, kazao je Željko Pauković iz Fondacije Mozaik.

U 2014. godini učešće Općine Cazin u fondu Omladinske banke je 7.500,00 KM, za što je predviđen poseban grant u Budžetu, a po riječima načelnika općine Cazin mr. Nermina Ogřeševića podrška nastavku projekta nije bila upitna.

„Rezultati su dobri i mi želimo da se ovaj projekat sa Fondacijom Mozaik nastavi. Sama vrijednost malih projekata s kojima neformalne grupe mladih apliciraju možda nije toliko značajna, ali je ova edukacija, sticanje iskustva na vođenju i izradi aplikacija, saradnja zajednice i brojni ostali faktori, itekako vrijedna. Gledam na to kao na kapital koji stičemo kroz ljude. U ovom slučaju mlade koji će sutra voditi i kreirati puno veće i složenije projekte u našoj zajednici“, izjavio je načelnik Ogřešević.



Grb Općine Cazin



Grb Općine Bužim

SVEČANO OBILJEŽEN DAN OPĆINE BUŽIM

Obilježavanje Dana Općine Bužim (20. februar) i 19. godišnjice ponovnog dobijanja statusa općine započelo je obilaskom i polaganjem cvijeća na turbetu generala Izeta Nanića i poginulih boraca 505. Viteške brigade, otvaranjem savremene Velike sale „Centra za kulturu, sport i informisanje“ Bužim, te održavanjem Svečane sjednice Općinskog vijeća Bužim, a u prisustvu brojnih gostiju i zvanica.

Okupljenima se obratio Abid Mulalić, predsjedavajući OV-a, koji je podsjetio na dosadašnji uspješan rad Općinskog vijeća, te planove istog u budućem periodu. Načelnik općine Bužim Agan Bunić na početku svog govora čestitajući ovaj značajan datum za općinu Bužim prisjetio se svih patriota koji su 1992. godine bili spremni stati u njenu odbranu bez obzira na žrtve.

„Iza nas je jedna veoma uspješna godina. Godina u kojoj smo zabilježili pomake na svakom planu, tako da je prva godina mandata obilježena nastavkom izgradnje svih projekata od kapitalnog značaja za općinu. U tim našim poslovima su nam pomogli prijatelji Bužima, oni koji su istinski željeli pomoći razvoju ove lokalne zajednice, ti naši prijatelji su dobitnici najviših općinskih priznanja, i danas su ovdje u viteškom Bužimu.“ – kazao je, između ostalog, načelnik Bunić.

Svečanosti su prisustvovali i načelnici Bihaća, Velike Kladuše, Bosanskog Petrovca, Bosanske Krupe i Ključa, kao i pojedini poslanici u Skupštini USK, mandatari za novu Vladu USK, te ostali mnogobrojni gosti i zvanice sa svih nivoa vlasti, i kulturnog i vjerskog života.

Povodom Dana općine Bužim na Svečanoj sjednici su dodijeljena najveća općinska priznanja i nagrade.

Za značajan doprinos u razvoju općine Bužim u raznim oblastima društvenog života i rada dodijeljena je nagrada „20. FEBRUAR“ firmi LJUBIJANKIĆ S-COMERC iz Bužima.

A ove godine, zvanje „Počasni građanin općine Bužim“, dodijeljeno je Adilu Osmanoviću, ministru u Vladi FBiH, a za doprinos u infrastrukturnom razvoju općine Bužim.

Također, dodijeljene su i plakete i zahvalnice zaslužnim pojedincima i kolektivima.

KORISNI LINKOVI ZA PREDPRISTUPNE
FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

VLADA FBiH DALA PODRŠKU INICIJATIVI ZA KREDITNO ZADUŽENJE TUZLE I
ZENICE

SARAJEVO, 6. mart/ožujak – Vlada Federacije BiH (FBiH) je na današnjoj sjednici podržala inicijativu da se kreditnim zaduženjem kod Kreditanstalt für Wiederaufbau (KfW) Frankfurt na Majni, u iznosu od 11.000.000 eura osiguraju sredstva za realizaciju druge faze Projekta vodosnabdijevanja i zbrinjavanja otpadnih voda u BiH, za općine Tuzla i Zenica.

Prihvaćen je i prijedlog JP "Vodovod i kanalizacija" d.o.o. Zenica za izmirenje obaveza Federacije BiH prema ovom preduzeću po osnovu presude Kantonalnog suda u Sarajevu od 21. maja 2013. godine na način da se u ekvivalentnom iznosu umanje potraživanja FBiH po ovom kreditu.

Vlada je zadužila Federalno ministarstvo finansija, općine Tuzla i Zenica da u tim za pregovore o kreditu imenuju svoje predstavnike, a konačna odluka o zaduženju bit će donesena nakon okončanja pregovora s KfW-om.

Krajnji dužnici po ovom kreditnom zaduženju su Općina Tuzla u iznosu do 6.250.000 eura, Općina Zenica u iznosu do 1.150.000 eura i JP "Vodovod i kanalizacija" d.o.o. Zenica u iznosu do 3.600.000 eura.



Savez općina i gradova Federacije Bosne i Hercegovine

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba



POSJETITE NAS NA WEB-U

WWW.SOGFBIH.BA

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

LAF SEMINAR NA TEMU BORBA PROTIV NEZAPOSLENOSTI MLADIH

U okviru programa Local Administration Facility (LAF) organizuje se seminar u Briselu pod nazivom „Politike zapošljavanja: borba protiv nezaposlenosti mladih“ (LAF Seminar on Employment Policies: fight against youth unemployment,) koja će trajati od 23. do 25. aprila/travnja 2014. godine. Cilj seminara je pružiti priliku lokalnim i regionalnim predstavnicima za upoznavanjem i razmjenom ideja u vezi sa EU procedurama i praksom u navedenoj oblasti.

Studijsko putovanje je otvoreno za učesnike iz Zapadnog Balkana (Albanija, Bosna i Hercegovina, Hrvatska, Kosovo, Makedonija, Crna Gora i Srbija) i Tursku. Maksimalno po sedam učesnika može biti izabrano iz svake od odabranih zemalja.

Aplikacija treba da sadrži popunjen prijavni formular, pismo interesa i CV. Zainteresovani kandidati treba da pošalju CV i pismo motivacije (sa detaljima njihovog obrazovanja i profesionalnog iskustva i na koji način će dalje da prenose informacije sa ovog studijskog putovanja). Prvi pregled pristiglih aplikacija obaviće EU Delegacija u BiH. Aplikacije treba da se šalju na adresu: DELEGATION-BIH-TAIX@eeas.europa.eu

Izbor kandidata vršiće Generalni direktorat za proširenje zajedno sa program menadžerima Delegacije Evropske Unije u BiH.

Jezik studijskog putovanja je engleski pa je stoga aktivno znanje engleskog jezika preduslov za učešće. Učesnici će biti direktno kontaktirani od strane kancelarije Generalnog direktorata za proširenje, pa stoga je bitno da kandidati navedu direktan broj telefona u prijavnom formularu. Znanje engleskog jezika je važno zbog praktičnih vježbi gdje će biti traženo učešće svih polaznika. Studijska posjeta organizuje se za učesnike koji nisu do sada bili dio LAF događaja ove vrste.

Krajnji rok za podnošenje prijava je 21. mart/ožujak 2014. godine.

U slučaju da imate bilo kakvih pitanja u vezi sa aplikacijom, molim Vas kontaktirajte gđu. Esmiru Kešan na: esmira.KEŠAN@eeas.europa.eu

Dnevni red, Uputstvo za apliciranje i Aplikaciju možete naći na web stranici Saveza.

